

■ Schloss Moritzburg un Weingut Wackerbarth im Dopplstöckerbus

Mit de Lang-Reisen konntn mir diesgahr wieder untern Togausflug bestreihn. Zeerscht hattn mor zeweeneich Leit, dann warns mit enn mol wieder zeviel un mir wollten schu e paar wieder osogn. Desserwagn ham se uns dann in Dopplstöckerbus gabn, do konnt mor unnere Mitglieder un halt aa noch e paar annere Eimstocker mitnamme. Dar grube Bus war absolut schie, bluß – de vorsprochne Reisebegleiterin war net do. Un nu

mußt mir, des haaßt, unnere Antina allis richtn un schlichtn. Aagefan-ge vu dor Mittagasserei, wu se de Wunsch vu allin aufschreibn muß bis zur Zählerei, öb aa alle immer wieder im Bus sei.

Geregt hatts aa noch, des warn mir ja gar net gewohnt, mir hattn eingtlich bei jeder Ausfahrt genuch Sonn vomewag gebucht. Nu ja, im Bus wars wenstns trocken.

Is erschte Ziel war e Radebeuler Bahnhuf vu dor Löbnitzgrundbah, dort sei mor in extra for uns reservierte Wogn eingestiegn un hattn do drinne schu mol ne Menge Spaß mit Eierlikör. De Fahrt ging bis zun Schloss Moritzburg. Do sei mir erscht emol de grusse herrschaftliche Trepp nauf gange, noocherts wieder runner, weils hieß, mir müsstn gelei untn zen assn gieh. Aber des war net ganz richtich, do gings halt wieder de Trepp nauf un do war dann aa gelei rachts is Schlossrestorang. Je noochdam, wos siech jeder ausgesucht hat, wars sehr gut bis nu ja bein Fisch. De meestn hattn Wildgulasch, dar war wuhl an bestn gelunge.

Dann wieder neine Bus, bei de unterstn gings schnell, for die ubn drinne de enge, steile Trepp nauf. Des hat dorwagn immer eweng gedauert, eh siech alle do wieder nauf gewürscht un ihrn Platzl eigenomme ham.

Nächster Halt: Weingut Wackerbarth.



Do hattn mir ne sehr gute Fiering, die uns allis lieber de Harstellung vu den Weinsortn un die vieln Fasser un Flaschn dorzählt hat. Allermacht, des hätt iech nie gedacht, des aus solch klenn Traubn esu ne Masse Fasser gefüllt warn kenne! Un dann: de Weinvorkosting! 3 vorschiedne Weine duftn mir kostn, e paar Antiakoholer ham dorfier in gutn Saft kricht. Un wie se de Gläser geschwengt un de Nosn neigereckt un dann endlich –

in Schluck genomme ham! Wos voraaner schmeckt nu an bestn? Do genne halt de Maaninge ausenanner, jeds hat in annern Geschmack. Des war insgesamt ne feine Sach gewaasn.

E Rundgang durch den schenn Park samt Weinberg hat den Aufnthal bein Wackerbarth abgerund un war e schiens Doralabnis.

Sugar ne Blaskapell hat do gespielt, aber iech glab die warn net extra for uns do. Wieder gings neine Dopplstöcker mit nor kurz'n Fahrt nooch Altkötzschenbroda. Dortn hattn mir Zeit for in Spaziergang durch die wunnerschiene Altstadt. Do durft natierlich ne Eikehr mit Kaffee un Kuchn, oder a mit nern Bier net fahln. Irgndwann gings ans bezohln, denn im Fünfe sollt mor halt wieder an untern Bus sei.

Iech hob miech extra noch emol imgedreht, und konnt sah, des alle noch dorbei warn, aber wu mir alle wieder eingestiegn sei – ach du lieber Schrack – alle warn do bis auf zwee! Aber Dank unnerer Fahndungsexpertin Kerstin vu dor SOKO Grußraum Eimstock konntn mir de Nummern 61 un 62 wieder aufspürn un eifange. Zen Schluss sei alle wieder gut dorham aakomme!

Tja, dann halt bis zur nächsten Ausfahrt dor Schmidt!

